

ПОЛУНОЩНИЦА НЕДЕЛЬНАЯ

Подобает ведати, аще несть в неделю бдение всенощное, бывает прежде утрени полунощница. Начало творим якоже и прежде явлено, в повседневно ой полунощнице, и глаголем вся, тамо писанная. И по пятьдесятном псалме глаголем канон Пресвятей и Животворящей Троице, во октаи настоящего гласа.

Перваго гласа

Канон Пресвятей и Живоначальной Троице, творение Митрофаново, нося краегранесие сицево: Едино Тя пою, Трисолнечное естество.

Песнь 1.

Ирмос. Твоя победительная десница, боголепно в крепости прославися. Та бо Безсмертне всемогущи противныя сотре, израильтяном путь глубины обновльши.

Запев: Пресвятая Троице Боже наш, слава Тебе (поклон).

Едино трисоставное Начало, серафими немолчно славят, безначально, присносущно, непостижно, творительно всех, еже и всяк язык верно поет песньми.

Запев. Да человеком единьственное, трисианное явиши Твое Божество, создав бо человека по Своему образу, вообразив ум ему и слово, и дух дав, яко Человеколюбец.

Слава. Свыше показав единьственную, в триех богоначальных составех державу, Отче, рекл еси равнодетельному Сыну Своему и Духу:

приидите, сошедше, языки их размесим.

И ныне, Богородичен. Ум убо не рождении Отец, образно премудрыми провещася, Слово же собезначальное Сын соестественныи, и Дух Святыи, Иже в Девей от слова создав воплощение.

Песнь 3.

Ирмос. Иже един сведии земных существо немощное, и милостивно в не оболкса, препояши мя свыше силою, воспевати Ти Святыи, церкви душевная, не изреченныя славы Ти Человеколюбче.

Запев. Ты древле яве Аврааму, яко явися трисоставен, единьственным же естеством Божества, богословие истиннейшее образно явил еси, и верно поем

Тя, единоначального Бога, и трисолнечного.

Запев. Из Тебе Отче, рождся боголепно и нетленно, просия Свет от Света, Сын неприменен, и Дух Божественны Свет изыде, и единого Божества лучи трисоставней поклоняемся, и верно славим (*поклон*).

Слава. Единица Троица преестественна, неизглаголанно паче смысла, умными существы славится, трисвятыми гласы немолчно вопиюще хвалу, с ними же согласно поется и нами трисоставен Господь.

И ныне, Богородичен. Из Тебе временно без семени, произыде прелетный, уподоблься нам невидимый, и едино естество и господство Отчее научи, и Сына, и Духа, Богородице. Тем же Тя славим.

Господи помилуй (*трижды*).

Седален. Глас 1-й.

Подобен: Гроб Твой, Христе:

Троице вседетельная и преблагая Единице, приими мольбы вопиющих непрестанно, бранными устнами: Свят, Свят, Свят воспеваемы серафимски. Жизнодавче спаси и ущедри, иже во святей церкви Твоей зовущих: Господи слава Тебе.

Слава, и ныне, Богородичен.

Помилуй нас, иже к Тебе зывающих Пресвятая Чистая, в ноци и во дни вопиющих, очисти наша прегрешения, ибо Милосердаго имаша послушающа Твоя мольбы, Матернею убо молитвою объемши умоли.

Песнь 4.

Ирмос. Гору Тя благодатию Божиею присенну, прозорливыма Аввакум усмотрив очима, из Тебе изыти Израилеви провозглашаше святого, на спасение наше и обновление.

Запев. Просияй ми богоначальная трисолнечная сияньми, Твоими богодетельными лучами, сердечныма очима доброту облистати, еяже паче ума богоначальныя Ти светлости, и светодателнаго и сладкаго Причастия.

Запев. Первее небеса утверждь Господи, и всю силу их Словом Своим вседетельным, и Духом уст соестественным, с Ними же владычествуеши всяческим, трисиянным единоначальным Божеством.

Слава. Якоже созда мя, по образу Своему и по подобию, богоначальная и вседетельная Троице, вразуми и просвети творити волю Твою святую и

благую, в крепости совершеную.

И ныне, Богородичен. Родила еси Пречистая Единого от Троицы, Богоначальна Сына, воплощшася нас ради из Тебе, и просвещшася земных, трисолнечного Божества не вечерним светом и сияньми.

Песнь 5.

Ирмос. Просвещеи сиянием пришествия Твоего Христе, и освящеи крестом Си мирския концы, сердца просвети светом Твоего богоразумия, правоверно хвалящих Тя.

Запев. Иже первую ангелом утварь славою посреде, неприступными Твоя доброты лучами осиявши, Твоими зарями просвети, Троице единовластная, православно Тебе поющих.

Запев. Ныне еднoестественная богонaчaльнaя трисолнечная, воспевaем Тя, еже осуществовaлa еси зa благость, прегрешений и напастей испрошaющи избaвления, и бед и скорбей.

Слава. Отца и Сына и Святаго Духа, едино Естество и Божество вернии славим, раздельно и нераздельно, единого Бога, невидимыя и видимыя твари.

И ныне, Богородичен. Речения всех пророк прописаша Пречистая, Твое Рождество, неизреченное и неудобь сказуемое, еже мы познахом, тайне научаеми единьству и трисолнечну Божеству.

Песнь 6.

Ирмос. Обыде нас последняя бездна, и несть избавляи, вменихомся яко овца на заколение, спаси люди Своя, Боже наш. Ты бо крепость немощным еси и исправление.

Запев. Равностоятельную силу яко имущи, Троице пресущная, в той же воли хотения, Единица еси проста и нераздельна, Ты убо нас силою Своею соблюди.

Запев. Ты вся веки хотением Своим, яко Блага, составила еси от несущих, непостижимая Троице, таже и человека создала еси, но и ныне от всякаго избави мя обстояния.

Слава. Безначальная и сопредельная Троице Святая, Отче и Сыне и Душе, вся живящи, вся же святящи, вся же спасающи единою силою. Тя бо славят херувими и мы недостойнии хвалу Ти воздаем.

И ныне, Богородичен. Солнца незаходимаго Храм была еси, создавшему и учинившему светила великая всеильно, Пречистая

Дево Богоневесто, но и ныне страстей мя избави и мучения.

Господи помилуй (*трижды*).

Седален. Глас 1-й.

Подобен: Гроб Твой, Спасе:

Припадаем Ти верою от сердца вопиюще: помилуй нас непотребных
Своя рабы, Троице Преплагая, Отче и Сыне со Духом, и
умилосердися Всемиловитая, на стадо еже собра мудре,
непрестанно славящее Твою благодать.

Слава, и ныне, Богородичен.

Дево, Иже из Тебе неизреченно рождшемуся молися: наша облегчити
сердца, во глубине отчаяния отягченная прегрешеньми, и возведи от
унынии тяжких, славити Тя Всемиловитая, едину надежду рабом Твоим.

Песнь 7.

Ирмос. Тебе мысленую Богородице пещь, рассмотрим вернии, якоже бо
отроки спасе три превозношаемыи, мир обновил есть, во чреве Твоём
совершен, восхваляемыи Отцем Бог благословен еси.

Запев. Слово Божие соестественное, озарение Вседержителя Бога, яко
же обещаея, еже во мне богодетельное вселение сотвори, яко
благоутробен, со Отцем Твоим и Духом, и страшна покажи мя бесом
и страстем.

Запев. Да Твоего благосердия Владыко пучину покажеша нам, Сына
Своею к нашему послав смирению, да паки вообразит на первую светлость, но
и ныне божественным мя вразуми Духом.

Слава. Трех святствы едино Божество славим, Отца безначального,
Сына же сопредельна, и Духа во единой державе, и верно вопием:
Отец наших Боже благословен еси.

И ныне, Богородичен. Иже на Херувимском Престоле носимыи,
всяческих Царь, во утробу Твою девственную вселися Пречистая,
всех избавляя от тли, яко Человеколюбец, но и ныне Твоими
молитвами сохрани мя.

Песнь 8.

Ирмос. Чудо превелие, росодавицу вообрази пещь образом, и яже бо
прият, не опали юных, тако же ни Огонь Божественныи Деву, Юже
пройде чисту. Тем поюще возопием: да благословит тварь всякая

Господа и превозносит Его во веки.

Запев. Манием богодетельным Господи всех, трисоставне и Вседержителю, небеса простерл еси яко кожу, таже и земли отделил еси глубину, всесильною Ти горьстию. Тем же и рабы Своя укрепи, любовь и верою Твоею Человеколюбче, да Тя поем во вся веки.

Запев. Просвети богоначальным светом человеки, поюция Твой трисолнечный Свет, единьственное же паки Существо, еже к Твоим светодательным лучам приизирати присно, ими же насыщуся славы Твоя сладкия, богодательныя и всебогатыя, и превозношу Тя верно во вся веки.

Слава. Приими хвалу и честь от непостизающаго ума нашего, Троице пресовершеная, вся озаряющи и ум просвещающи, областью Си и силою. Тя бо славят небесныя силы, и мы земнии немолчно вопием, и превозносим во вся веки.

И ныне, Богородичен. Вознесе на небеса, человеческое прием естество непреложно, Сын Твой Пречистая Богородице, премножеством благодати, избавль древния тли. Ему же благодарьствено воспеваем, да благословит тварь всякая Господа и превозносит Его во веки.

Песнь 9.

Ирмос. Образ чистаго Рожества Твоего, распалаему купину яви неопалиму и ныне на нас напастей свирепеющую пещь угасити молимся, да Тя Богородице непрестанно величаем.

Запев с поклоном. Спаси Спасителю твари, чувственныя и умныя рабы Твоя, от бесовскаго навета и озлобления, Пресвятая Троице единосущная, и соблюди Свое стадо всегда ненаветно.

Запев. Да глубину неизочтенную и существенную, покажеши Своя благодати, дал еси нам трисолнечне и единоначальныи Боже всесильне, обеты спасительныя Твоим рабом, яже совершити сподоби.

Слава. Призри к нашим мольбам, иже в трех богоначальных составех, един Сый Бог всегда славимый, и подаждь Твоим рабом утешение, молитвами Пречистыя и Всепетыя Богоматере.

И ныне, Богородичен. Не стерпе земнаго естества зрети в тление впадша, преслушанием первозданнаго, но преклонь небеса сниде, не разлучься, в Девей без отца воплощся, да земныя обожит.

Второго гласа

Канон Пресвятей и Живоначальной Троице, творение

Митрофаново, емуже краегранесие: Троице пою Богоначалия честь. Глас второй.

Песнь 1.

Ирмос. Во глубине потопа древле, фараонитская вся воинства, преоружена сила. Воплощшееся Слово, преспеюция грехи потребило есть, преславныи Господь, яко прославися.

Запев: Пресвятая Троице Боже наш, слава Тебе (*поклон*).

Троичное единачальное естество Божества, песнено воспоем глаголюще, милости пучину неизчерпаемую, существеную яко имущи, Тебе кланяющихся ущедрити и спаси, яко Человеколюбец.

Запев. Иже источник и кореню Отче, сии виновен, еси Сыну и Святому Духу, соестественаго Божества, трисолнечныи сердцу моему просвети свет, и причастием осияй, богодейственным сиянием.

Слава. Трисиянная Единице богоначальная, весь разори грехов моих и страстей мрак, светлыми зарями Твоими и сладкими причащением, и сотвори мя Твоя неприкосновенная славы, церковь и сень одушевленную.

И ныне, Богородичен. Ток древнии естества нашего, пострадавшии неподобно и к тли поползшиися Пречистая, воплощся из утробы Твоя Бог Слово, человеколюбезно осия, и богоначалию трисветлому нас тайно научи.

Песнь 3.

Ирмос. На камени мя веры утверди, разшири уста моя на враги моя, возвеселибоя дух мой воспевати: несть свята якоже Бог наш и несть праведна паче Тебе Господи.

Запев. Равенством естества богоначалия, единочестно славлю Тя лица, живот бо от живота Ты произшед без тли, сии Един Бог наш, и несть Свята паче Тебе, Господи.

Запев. Ты чины невестественная небесная составил еси, яко зеркала Твоя доброты Троице, нераздельное Единачалие, пети непрестанно Тебе. Но и ныне нашу от бранных уст приими хвалу.

Слава. Утверди на камени веры, и разшири любве Твоя пучиною, сердце и мысль Твоих раб, Единице трисолнечная. Ты бо еси Бог наш, и на Тя уповающе не посрамимся.

И ныне, Богородичен. Иже всяк прежде состав осуществовавыйи твари,

во утробе Ти осуществовася неизчетною благостию Богородице,
и Свет трисолнечный всем восия, единого Божества и Господства.

Господи помилуй (*трижды*).

Седален. Глас 2-й.

Подобен: **В**ышних ищя:

Святая Троице помилуй, их же созда и избави огня и всякого осуждения, яко вся можеши яко щедр Бог, и многомилостив. Тем же припадаем Ти зовуще, согрешихом прости Человеколюбие.

Слава, и ныне, Богородичен.

Исполньшеся многих язв раби Твои, невидимыми стрелами губителя, и на одре лежаще отчаяния, Владычице зовем: не презри мольбу нашу, иже верою притекающих Ти.

Песнь 4.

Ирмос. **П**ою Тя, слухом бо Господи услышах и убояхся, до мене бо прииде, мене ища заблуждышаго. Тем многое Твое сошествие, еже на мя прославляю обновление.

Запев. **Р**азумети Тя не возмогут чинове невеществении ангельстии, Единице Троице безначальная: но убо мы бранным языком Твою существеную благодать воспеваем со страхом и славим.

Запев. **С**ыи Вседержителю, Создатель твари естества человеческого, все мое видиши ныне неможение, яко Всевидец. Тем же ущедри раба Своего и к жизни лучшей паки возведи.

Слава. **Е**диницы начальныя, несмесна три Лица воспеваем, яко свойственно имуща, и раздельна составы. Но убо совокуплена и нераздельна, во свете и славе Божества.

И ныне, Богородичен. **Х**рам Тя чист и пречист, присно Дево Богородице, Вседетель обрете едину яве от века, в Нем же пожив, вообрази человеческое существо, яко Человеколюбец.

Песнь 5.

Ирмос. **П**росвещение во тме лежащим, и спасение неначаемым Христе Спасе мой, к Тебе утреннюю Царю мирный, просвети мя сиянием си, иного бо разве Тебе Бога не знаем.

Запев. **Я**ко всячески на вся сущия Твоего промысления,

миродарныя простирая лучи и спасеныя. Царю смирения, соблюди мя в мире Твоем, Ты бо еси живот и мир всяческому.

Запев. Моисею в купине яко явися в видении огнене, ангел наречеса Отчее Слово, еже к нам Твое проявляя пришествие: им же всем яве возвестил еси державу Богоначалия Единого Трисоставную.

Слава. Иже естественую соприисносущную славу предложыши, единачальная Троице Святая, воспевающих Тя православною верою, Твоя славы видети сподоби, безначальную и едину зарю Трисолнечную.

И ныне, Богородичен. Содержителен по существу сый Бог Слово всем веком, Дево Мати, во чреве Твоем удержася неизреченно, человеки призывая к совокуплению единого Господьства.

Песнь 6.

Ирмос. В бездне греховней одержим, не изследную милосердия Твоего призываю бездну, от тли Боже мя возведи.

Запев. Волителю милости, помилуй иже в Тя верующия, Боже трисолнечне, и прегрешении избави, и от страстей и бед спаси. *(Дважды).*

Слава. Неизглаголанною пучиною благости, необмыслимую Твоего сияния, и трисияннаго Божества, светодателную светлость даруй ми.

И ныне, Богородичен. Неизглаголанно Дево, Вышний Человек быв из Тебе, в человека всячески оболкся, и светом трисолнечным озари мя.

Господи помилуй *(трижды).*

Седален. Глас 2-й.

Подобен: Вышних ища:

Христе Боже едине преблагии, Иже кровь Свою нас ради излиявыи, на Кресте повешен, советом Отца Твоего и Духа. Сего ради дерзающе зовем, помилуй стадо Свое Человеколюбче.

Слава, и ныне, Богородичен.

Дево Чистая, помилуй рабы Своя, и избави огня и всякия муки, в нощи и во дни зовущих Твоему Сыну Пречистая: не презри стадо Свое, молитвами Христе, Тебе Рождшыя.

Песнь 7.

Ирмос. **О** теле злате, на поле деире служимем, трие отроцы нерадиша о безбожном велении, но посреде пламене ввержени прохлаждаеми пояху, благословен Бог Отец наших.

Запев. Уставляеши присно ангельская воинства к непреложению, едине сыи неизменне и трисоставныи Господи. Покажи убо и мое сердце непреложно всегда, во еже славити Тя тепле и воспевати благочестно.

Запев. Лицы умнии невещественных существ, Твоими лучами Боже, единовластне и трисолнечне, озаряеми бывають, положением втории светове. Их же и мене сиянием и причастием покажи свет, яко Светодатель трисиянен.

Слава. Трисветлыми зарями освещаема Троице Пресвятая, во единой державе, храни Своя певцы от противных напастей, да Тя непрестанно славим, Отче, и Сыне, и Пресвятый Душе, во Едином Божестве.

И ныне, Богородичен. Направляя нас и возвышая к небесем неоскудно, Тебе любящих: иже за не изреченное человеколюбие, быв человек во утробе Девыя и обожив человека, и на Престоле славы со Отцем спосади.

Песнь 8.

Ирмос. В пещь огненую к детем еврейским сошедшаго, и пламень на хлад преложьшаго Бога, пойте вся дела Господа и превозносите Его во веки.

Запев. Непрístupная Троице, соприсносушная, собезначалная, богоначалная, неизменная во всех, кроме светоносных свойств, весь лукавыи упраздни сопостатных совет, и смущения бесов, невредна творя мя присно, Господи всяческим.

Запев. Премудро и всемошно, неописанное трисолнечное единоначалие составльшее мир, и соблюдающее Твоею силою в чину всесовершенном, вселися в мое сердце, пети и славити Тя немолчно с лики ангельскими во вся веки.

Слава. Премудрости Отчая непостижиме, неизреченне Божии Слове, непреложное Твое и Божественное естество не изменив, естество человеческо восприял еси, и единственную Троицу чести всех научил еси, яко господоначальную во вся веки.

И ныне, Богородичен. Правости Мудрость, Яже всех направляющая, возлюби по достоянию Тя, всечистую Деву и светоносную, и несказанно Пречистая, в Тя всельшися. Юже песнословяще, поем зовуще, благословите вся дела Господа, и превозносите Его во веки.

Песнь 9.

Ирмос. Яже прежде солнца светильника Бога восиявша, плотию к нам пришедша из боку Девичу, неизреченно воплотившая, благословенная Чистая: Тя Богородице величаем.

Запев с поклоном. От Света безначальна, собезначален Сын Свет просия, и со естественныи Свет Дух изходит: неизглаголанно, боголепно: нетленну Рожеству уверяеми, вкупе же и неизреченному исхождению.

Запев. Восияй в сердца, трисолнечное Божество, воспевающих Тя трисиянным светом Ти, и даждь разум еже во всех разумети, и зрети Твое хотение, благое и совершенное, и величати и славити Тя.

Слава. Неизочтен естеством сии, яко Бог, неизочтеную пучину щедрот имея, ущедряя Троице прежде. Тако и ныне ущедри рабы Своя, и от прегрешении избави, и напастей и бед.

И ныне, Богородичен. Спаси мя Боже мой, от всякого искушения и озлобления, Иже в триех лицах воспеваемыи, несказанно единьствене Бог всеильныи. Твое стадо сохрани Богородицы молитвами.

Третьего гласа

Канон Пресвятей и Живоначальной Троице, творение Митрофаново, патриарха Царьграда, емуже краегранесие: Х ваю Тя Троице, едино Богоначалие. Глас третий.

Песнь 1.

Ирмос. Иже воды древле манием божественным, во едино соньмище совокупи, и раздели море израильтеским людем. Се Бог наш препрославлен есть, Того Единого воспоем, яко прославися.

Запев: Пресвятая Троице Боже наш, слава Тебе (*поклон*).

Непостижимая едина, Господоначальная, и едино троическое Богоначалие, трисияннаго света Твоего сподоби мя, яко да воспоею Тя певаемую непрестанно трисвятую силу ангельскими усты.

Запев. Священно невестествении вси чинове поют, яко творческую вину единственую трисветлую, начальнейшии Тя свет. Юже согласно поем, и человеческая множества и верно славим бренными усты.

Слава. Ум и Слово, и Дух, богословцы присно образно Тебе наричут, Безстрастно Рожество, от нерождена Отца Сыну знаменующе, Боже единоначальне всем вкупе, и Божественнаго Духа исхождение.

И ныне, Богородичен. **Я**ко Человеколюбец естеством, человеческое существо прием Божии Слове, троичныи восиял еси единачалнейшии свет единого Божества, препрославлену всем показа рождшую Тя Деву Пречистую.

Песнь 3.

Ирмос. **И**же от несущих вся приведи, словом созидаемая, совершаема же Духом, Вседержителю Вышнии, в любви Своей утверди мене.

Запев. **У**троити воду древле повелев Илия на поленах, образно прояви троичныя составы единственнаго Божия Господоначалия.

Запев. **Т**ленное естество, поет Тя земнородных, единого и трисветлаго Создателя неизменнаго, и вопию Ти Владыко всякаго мя напрасньства избави и спаси мя.

Слава. **Р**авно вещающе словесем пророческим, премудрых апостол же и проповедник веры, равнодетельную Троицу Тя славословим вернии, Боже всех.

И ныне, Богородичен. **О**т Престола високаго сниде Слово, человека возвышая, яко Человеколюбец, Тобою Пречистая, и трисолнечныи Свет всем восия.

Господи помилуй (трижды).

Седален, глас 3.

Подобен: **К**расоте девства:

Троице нераздельная и неразлучная, нас помилуй, поклоняющихся Ти (*поклон*), и воспевающих благочестно, и зовущих непрестанно Тебе: спаси их же собрала еси милосердия ради милости, в церкви святей Твоей, еже славити державу Твою. Ибо яко Милостив, веси сердца нашего немощь.

Слава, и ныне, Богородичен.

Весь изменихся невоздержанием, и безстрашием моим несмысленныи, нечувствуя окаянныи, не трепещу дне, его же трепещут вся видимая и невидимая. Владычице помози ми, и сердечное разори недоумение. Сама бо еси упование, и предстательница рабом Твоим.

Песнь 4.

Ирмос. **П**оложи к нам твердую любовь си Господи, Единочадаго бо Ти Сына нас ради на смерть вдал еси. Тем же Ти вопием, восхваляюще: слава

силе Твоей.

Запев. Отрасле сугубе от Отца, яко от корене прозябоста, Сын и Дух Правый, соестественна прозябения и богосажденна, и цвети собезначальнии. Яко трием быти светилом Божества. *(Дважды)*.

Слава. Собори умных существ, непрестанно поют Тя неведомаго Бога. С ними же и мы славим, глаголюще: Троице пресущная, Своя рабы сохрани, яко Милосерд.

И ныне, Богородичен. Распалил еси нас в любовь Твою, Многомилостиве Слове Божии, Иже нас ради воплощься непреложно, и трисветлое едино Божество тайно сказав. Тем же Тя славим.

Песнь 5.

Ирмос. Яко виде Исаия образно на Престоле превысоце Бога, от ангел славы дароносима, О! окаянный вопияше аз, провидех бо воплощаема Бога, Света невечерня, и миром обладающа.

Запев. Единого Господоначальника, образно яко виде Исаия Бога, в триех Лицех славословима пречистыми гласы, серафим послан бысть проповедати абие трисветлое Существо, и Единицу трисолнечную.

(Дважды).

Слава. Иже не видимых и видимых естество, от несущих прежде составляющая Единице трисолнечная, иже единого Тя Бога верно воспевающих, от всяких искушении избавльши, Твоей славе сподоби.

И ныне, Богородичен. Невестник светоносен и чист, бывшая Дево Богу, воспеваем Тя любовью и блажим. Из Тебе бо родися Христос, в существех и хотениях сугубых, Иже единый от Троицы, славе сыи Господь.

Песнь 6.

Ирмос. Бездна последняя грехов обыде мя, и исчезает дух мой. Но простер Владыко высокую Свою мышцу, яко Петра мя Управителю спаси.

Запев. Преселник сыи Авраам, сподобися образно восприяти, во образе убо Господа, в триех составех пресуществена, мужескими зраки.

(Дважды).

Слава. Направи сердца Своих раб, к свету неприступному, о трисолнечне Господи. И Твоя славы сияние подаждь душам нашим, еже облистатися Твоею добротою неизреченною.

И ныне, Богородичен. **От**верзи мне двери Света, рождышагося от утробы Твоея Пречистая, да зрю трисветлую лучу Божества, и славлю Тя всесветлую Владычицу.

Господи помилуй (*трижды*).

Седален, глас 3.

*Подобен: Дева*я днесь:

Егда приидеши Владыко на землю судити всем, их же от земли создал еси по Своему образу, ущедри яко Милостив, и избави всех Суда Твоего праведнаго, и не посли нас во огонь геенский, яко един Христе многомилостив.

Слава, и ныне, Богородичен.

Стонание ми даруй Дево, яко же мытаревы и блуднице слезы, да Тебе сия приношаю и зову: помилуй мя Всемиловитая, и разреши недоумение мое благодатию Си, умиления тучу ми подавая: к Тебе бо прибегах Пречистая.

Песнь 7.

Ирмос. **Я**коже древле благочестивыя три отроки оросил еси, в пламени халдейском, светлым божества огнем, и нас озари, благословен еси зовущих, Боже Отец наших.

Запев. **Х**рам мя покажи Твоего Божества Владыко, трисияннаго, всесветла, греховнаго омрачения лютаго, и страстей вышша, светодательными Твоими сиянии. Боже Отец наших благословен еси.

(Дважды).

Слава. **Б**ожества Твоего зрак един возвещаем, в триех составных и нераздельных свойствах, Отца и Сына и Духа. Благословен еси зовуще, Боже Отец наших.

И ныне, Богородичен. **Я**вися на земли, быв Человек Вседетель, боголепно от Девическия и пречистыя Ти утробы и нас обожи, благословен еси зовущих Боже Отец наших.

Песнь 8.

Ирмос. **Н**епостоянным огнем совокупльшися, иже благочестием предстояще юноши, пламенем же неврежени, божественую песнь пояху: благословите вся дела Господня Господа, пойте и превозносите Его во веки.

Запев. Безначальна Отца яко от корене, Слово и Дух собезначальна по естеству суца, яко отрасли пресущественаго Богоначалия, показаша Троицы славу едину и силу, Юже песнословим во вся веки. *(Дважды)*.

Слава. Управляеши Твоими светлостьми чины небесныя, воспевати немолчно трисвятыми песньми божественными, Отче и Слове сообразне и Душе, трисветлую державу и равномощную. С ними же Тя поем во вся веки.

И ныне, Богородичен. Проречения пророческая, Твое Рождество Богородице, издалеча видевшие восхваляху, яко без семени и паче естества Рожьшагося, Владычице, и согласно Сего поем яко Господа, и Тебе рожьшую чтем Дево во вся веки.

Песнь 9.

Ирмос. Новое чудо и боголепно, Девическую убо дверь затворену яви прошедый Господь, наг во входе, и плотоносец явился во исходе Бог, и пребывает дверь затворена. Сию непрестанно, яко Матерь Богу величаем.

Запев с поклоном. Видети славу трисиянную, боговиднии безплотных чинов яве, невестественными крилы восходить желают горе, но говеют зело неприступному Свету, и пение непрестанно вопиют. С ними же согласно, единьственная Троице, Тя славим. *(Дважды)*.

Слава. Несытною любовью иже на земли, умную душу от Тебе приемше и словесную, Тебе поем, Владыко Боже Вседержителю, единьственное естество воистину и троичное лица, от всего сердца. Тем же Всецедре, яко Всесилен соблюди нас.

И ныне, Богородичен. Храм мя покажи, единоначальнаго и трисветлаго Твоего Богоначалия световиден. Чисто служити Тебе Зиждителю всех, и неизреченную Ти славу умно зрети. Молитвами единья Богородицы, Юже достойно яко Преславную величаем.

Четвертаго гласа

Канон Святей и Живоначальной Троице, ему же краегранесие: Четвертое пение Богу. *Творение Митрофаново, патриарха Царьграда. Глас 4.*

Песнь 1.

Ирмос. Моря чермнаго пучину, немокрыми стопами, древле шествовав Израиль, крестообразно Моисеовыма руками, амаликову силу в пустыни победил есть.

Запев: Пресвятая Троице Боже наш, слава Тебе (*поклон*).

Троицу богоначальную да прославим составы, единьственную, естеством триех, соприсносушную, сопрестольную, Юже моляще глаголем: спаси иже верою Тебе славящих.

Запев. Помазан от Отца Духом радости, богоделным елеом, яко Сын и Человек бысть, и единого Божества трисоставное научил есть.

Слава. Доброту неприступныя славы Твоея, Единице трисолнечная, Серафими не терпяще зрети, спокрываются крылы, и трисвятыми песньми непрестанно Тебе славят.

И ныне, Богородичен. Неизреченно Творца всех родила еси Пречистая, избавляющаго древния клятвы человеки, и смертныя тли. И Тебе ради познахом, единого Бога трисоставного.

Песнь 3.

Ирмос. Не мудростию, ни силою, ни богатством хвалимся, но Твоею Отчею составною мудростию Божию, яко несть свята паче Тебе Человеколюбче.

Запев. Силу свыше святым Твоим прежде апостолом, яко послал еси Христе, от Отца Утешителя, едино явил еси естество трисолнечное.

Запев. Патриарху Аврааму, егда явился во образе мужесте, троичная Единице, непременно показала еси Твоея благодати господство.

Слава. Иже в Лицах триех, един Бог веруемыи, неописанныи яве и недомыслимыи всеми, избави душа наша от всякия скорби.

И ныне, Богородичен. Наставльшеся Сына Твоего яве научеными, единственное и трисветлое Богоначалие славим, и Тебе блажим присно Девую.

Господи помилуй (*трижды*).

Седален. Глас 4-й.

Иже единым мановением, и пречистым советом Отца Твоего и Духа, создал еси всяческая, Христе Многомилостиве, распятие прият за род человеческий. Тем же благодаряще воспеваем вопиюще, помилуй стадо Свое, единае Человеколюбче.

Слава, и ныне, Богородичен.

Поем Тя Богоневесто Мати Христа Бога, славяще Рождество Твое непостижимое, им же избавихомся прелести диявольския, и

всех напастей, Владычице Богородице. Тем же верою вопием Ти, помилуй стадо Свое, едина Всепетая.

Песнь 4.

Ирмос. Седяи во славе, на престоле Божественем, на облаце легце, прииде Исус Пребожественни, от Пречистыя Девы, и спасе вопиющая, слава Христе силе Твоей.

Запев. Пресущная Троице, во единице Божества и Господоначалия, с Серафимы Тебе славим, яко нераздельно естество, яко неслитно, яко равномошно славою, Боже непостижиме.

Запев. Разделенную неизреченно Лицы Божества, и соединяему державою единого Господства, безпредельну, едину неописанну, воспеваем Тя, Творца всея твари.

Слава. Ум безначальни, Слово неизглаголанно роди, и Божественни Дух равномошни, от Него же изыде. И сих ради Троицу единосущную воспеваем Тя, Бога Творца всея твари.

И ныне, Богородичен. Зряся древними образно предвозвестити, еже от Тебе Дево, воплощение Слова: но послежде явлься человеком, поистине трисоставное Единоначалие явив.

Песнь 5.

Ирмос. Удивишася всяческая о божественей славе Твоей. Ты бо браку неискусимая Девице, прият во утробе надо всеми сущаго Бога, и родила еси безлетнаго Сына, всем воспевающим Тя мир подавающа.

Запев. Разумевше от веры вседетельнаго Божества, едино убо неприступно Существо, три же составы живоначалны сраслены поем, Отца и Сына, и Духа Святаго, соприсносущное бытие.

Запев. Свете трисолнечне, существеннаго света Твоего восияй ми, единственное Божество, несозданное Естество, Светодателю и Источниче всякия светодательныя зари, да созерцаю Твою доброту неизреченную.

Слава. Яко единому сущу Содетелю всяческих, и Содержителю, и кормчии всепремудру воистину, и жизни Подателю, припадаем Ти вернии: Владыко трисолнечне, поющих Тя соблюди.

И ныне, Богородичен. Обожити хотя древле истлевшаго человека, его же за благость создав, Сын Твой Дево, и показав образ божественнаго зрака, Человек бысть из Тебе, и едино трисолнечно богоначалие проповеда.

Песнь 6.

Ирмос. Возопил прообразуя погребение тридневное, пророк Иона в ките моляся, из тли спаси мя, Иисусе Царю сыи силам.

Запев. Яви Отец изглаголя сыновство, и Дух, Христу крестившуся, видим быв. Сего ради едино Троичное Богоначалие славим.

Запев. Яко видел Тя трисвятыми гласы воспеваема Исаия, на висоце престоле сидяща, Троичныя позна единого Богоначалия составы.

Слава. Возвышено сердце покажи и нас раб Твоих, высокии Царю трисоставне, да Твоя славы зрим ясно светлость.

И ныне, Богородичен. Согреших, но Тебе не отступих окаянныи, ущедрни мя трисоставне, едино Божество честное, и лютаго мя избави осуждения, мольбами Богоотроковицы.

Господи помилуй (*трижды*).

Седален. Глас 4-й.

Непостижимы Боже и неприступныи, Иже един естеством Благ же и Милосерд, Отче и Сыне и Душе Всесвятыи, соблюди и освяти, иже верую вопиющих в церкви святей Твоей, в нощи и во дни, и не предаждь нас Владыко врагом, ищущим нашу погибель.

Слава, и ныне, Богородичен.

Не премолчим присно Дево, благодарно воспевати от сердца раби Твои, Твоя милости Владычице, зовуще и глаголюще: Пресвятая Дево предвари и избави от враг невидимых и бед, и всякого прещения, Ты бо еси наше заступление.

Песнь 7.

Ирмос. В печи авраамския дети персидстей, любовь благоверия паче, нежели пламенем опаляеми, взываху: благословен еси в церкви славы Твоя Господи.

Запев. Учиненая небесная естества и умныя чиновы, православно вси земнороднии подражающе славим: едино Божество в трех равнодетельных составех.

Запев. Речи святых пророк Тя древле образно Единого веком всем творительна проявиша, неизреченного Бога и Господа, богоначальными тремя составы.

Слава. Славою и честию поклоняемся (*поклон*) Троице пресвершенной, во единой воли в триех Лицах, ими же состоится тварь вся блюдома, востанием Христа благословенного Бога.

И ныне, Богородичен. Иже по существу невидимое Слово, и вседетельное явился еси человеком, от чистыя Боюматере Человек, человека призывая к Причастию Христе Твоего Божества.

Песнь 8.

Ирмос. Руце распростер Даниил, львова зияния в рове затче, огненую же силу угасиша добродетелию поясавшесе, иже благочестия любители отроцы взывающе: благословите вся дела Господня Господа.

Запев. Свете единственнии и трисияннии, Существо безначальное, доброто неведомая, в сердце моем вселися, и храм Твоего Божества световиден и чист покажи мя, зовуща: благословите вся дела Господня Господа.

Запев. От различных мя страстей, Троице неразделная, Единице неслитная, омрачения прегрешении избави, и озари лучами Твоими богодетельными, да зрю Твою славу, и воспеваю Тя славы Господа.

Слава. Кто изрещи может, или разумети Бога когда в существе Божии? Его же ни ангели вси, ни архангели могут исповедати достойно. Той бо изшед от существа Отча, разори врага востанием Своим.

И ныне, Богородичен. Ум убо не рожденный Отец, и Слово сообразно, и Дух сопрестолен: существо, сила, бытие. Пресущная неизреченная, великодейственная Троице Единице, соблюдай стадо Свое, молитвами Богородицы яко един Человеколюбец.

Песнь 9.

Ирмос. Всяк земнородный да възиграется Духом просвещаемь, да ликоствует же безплотных умов естество, почитающее святое торжество Божия Матере, и да поет: радуися Преблаженная Богородице чистая присно Дево.

Запев с поклоном. Все к Тебе ныне движу сердце мое и мысль: и любы же от всея души и тела, Создателю и Избавителю моему, единовластне трисветле, и вопию Ти: спаси мя раба Твоего, от напастей всяких и скорбей.

Запев. Возвыси наш ум и мысль к Тебе Вышнему, Отче, и Слове, и Утешителю, во свете живыи неприступнем, славы солнце Светодержьче, просвети Твоими сияньми пречистыми, всегда славити Тя единоначального Бога трисоставного.

Слава. Един Свет в трех собьствех, Лицы разделяемыи, Отец и Сын и Дух Святыи, Ими же вся тварь состоится. Юже обновляя Сын, сниде и пострадав, воскресе тридневно.

И ныне, Богородичен. Спаси иже в Тя верующыя Господи, и проповедающих Безначальное, Присносущее Существо едино, три же Лица богоначальна и сообразна Твоего господьствия, и божественей славе сподоби, мольбами чистыя Богоматере.

Таже, припевы Григория Синаита по троичном каноне, по вся воскресения.

Достойно есть боголепно, еже славити Тя, Троице Святая, необыменнаго и пресущнаго, и всеблагаго Бога нашего, юже поют вси земнороднии, и славословят силы небесныя, еже от всех верно поклоняемую, единицу по существу триипостасную.

Господоначальную херувим и богоначальную без разсуждения серафим, юже нераздельну Троицу во единице, сущее богоначалие, Тя величаем.

Отцу безначальну и Богу собезначальну, Слову со Духом поклоняюся (*поклон*) : неразлучну, едину, соединяему по существу, тричисленую Единицу, верою славим.

Воспоем вси боголепно, песньми божественными, Отца же и Сына, и Духа божественнаго, трисоставное естество, едино царство же и господство.

Лучезарныя Твоя молнии восияй ми, Боже мой, трисоставне Вседержителю, и дом мя покажи Твоя неприступныя славы, светел и светоносен и неизменен.

Достойно есть яко воистину славити Тя Бога Слова, Его же трепещут и ужасаются херувими, и славословят силы небесныя, Иже от Девы неизреченно воплощьшагося Христа Жизнодавца, со страхом прославим.

Слава. Отче Вседержителю, Слове Божиим, Всесвятыи Душе, едина сила и образ, едино царство и божество и власть, помилуй и спаси поклоняющихся Ти (*земной поклон*).

И ныне. Из мертвых видевши Твоего Сына, Пречистая Дево, воскресша боголепно, радости неизреченныя тварь исполняшеся, Того славяще, Тебе величаем.

Посем Трисвятое. И по Отче наш. Кондак настоящего гласа.

Глас 1.

Воскресл еси яко Бог из гроба в славе, и міра совоскресил еси, и естество человеческое яко Бога воспеваает Тя, и смерть исчезе, Адам же ликует Владыко, Евва ныне от уз свободжаема радуется зовущи: Ты еси, Иже всем подая, Христе воскресение.

Глас 2.

Воскресл еси от гроба, Спасе Всесильне, и ад виде чудо сие ужасеся, и мертвии востаха: тварь же видящи, радуется с Тобою, и Адам вкупе веселится, и мір, Спасе мой, воспеваает Тя присно.

Глас 3.

Воскресл еси днесь из гроба Щедре, и нас возведе от врат смертных, днесь Адам ликует, и радуется Евва: вкупе же пророцы с патриархи воспевают непрестанно Божественную державу власти Твоея.

Глас 4.

Спас и Избавитель мой, из гроба яко Бог, воскресив от уз земнородных, и врата адова сокрушив, и яко Владыка воскресе тридневен.

Таже, Господи помилуй (40).

Слава, и ныне.

Честнейшую херувим.

Именем Господним благослови, отче.

За молитв святых отец наших, Господи Исусе Христе, Сыне Божию, помилуй нас. **А**минь.

И глаголем молитву сию, Пресвятей Троице, творение Марка инока:

Всемогущая и Животворящая Святая Троице, и светоначальная, яже мірную всякую и премірную тварь, за едину благодать от несущих приведы, и промысляя и содержащи, иже по прочих Твоих неизреченных о земном роде благодеяниях, и покаяние нам ради плотскаго неможения до смерти даровавши, не остави нас окаянных в лукавых наших деяниях умрети, ниже злоначальнику и завистьцу, и губителю посмешьство быти. Зриши бо Благосерде, елик убо оного на нас навет и вражда, елико же и наше страствование и слабость и небрежение, но неоскудная Ти благодати соделай на нас, молим на всякий день и час прогневающи Тя, честных и животворных заповедей преступлением. И вся убо всего прешедшаго живота нашего, и до нынешняго часа согрешенная нами, в деяниях, или глаголаниих, или в помышлениях, остави и прости. Сподоби же нас,

прочее скончати житие в покаянии, и умилении, и соблюдении святых Твоих повелении.

Аще убо сладостию прельстившися, многообразне согрешихом, или мїрскими похотьми неполезными и вредными обольстившися препроводихом, аще гневом и яростию подвигшися безсловесною, кого брата нашего оскорбихом, аще языком неизбежных и стропотных и крепких сетей объяхомся, аще коим чувст наших, или всеми волею или неволею, ведуще или неведуще от восхищения или поучения безумно поползохомся, аще же лукавыми помыслы и суетными совесть осквернихом, аще ли коим другим образом прегрешихом, от предприятия и обычая томими злаго, прости нам, и остави вся Всецедре, Преблаже и Многомилостиве, и даруй нам прочее бодрость и силу, во еже творити волю Твою благу, и благоугодну и совершену, да ношнаго и мрачнаго зла, световидным покаянием прменьшеса, и яко во дне благообразно ходяще, и очищени объявимся человеколюбию Твоему недостойнии, воспевающе Тя и величающе во веки, аминь.

Слава, и ныне. Господи помилуй (*Дважды*), Господи благослови.

Отпуст. Воскресыи из мертвых, Господи Исусе Христе, Сыне Божии, молитв ради Пречистыя Ти Матере, и преподобных и богоносных отец наших, и всех ради святых, помилуй и спаси нас, яко Благ и Человеколюбец.

Аминь. И прочее все, якоже в повседневней написася полунощнице.